

Zum 18. noch ein stück auff ein ander weiß / als das vorige welches auch bequemer vnd nützlich gegen dem Feindt kan geübt werden / nemlich daß / wann die Doppelsoldner mit ihre Schlachtordnung hart auff ein ander gangen / vnd sich zusamen gethan haben / so woll vor sich als hinder sich / vnd auff Fußvolck treffen wollen / müssen oder sollen sie ire Spiess wie sich das gebürt stracks vor sich / ein jeder neben seinem mann / in die enge Gassen gegen ihrem Feind halten / vnd also fort gehen.

Wie sich dann auch die Schützen beyderselts der Flügel in solchem fall gegen irem Feindt erzeigen / nützlich gebrauchen / wehren / vnd verhalten sollen / Nemlich daß sie für allen dingen ire Reihen öffnen / vnd wann das forderst glied auff der rechter handt der Schlachtordnung angeschlagen / vnd geschossen hat / muß sich das selbige glied auff die rechte handt vffm Fuß umbwenden / vnd also durch die Gassen herabwarts durchgehen / vnd werden also die hindersten bey Litera A. welches man heisset Rechts vmb kehret ewere Reihen.

Daß 2. glied muß fortgehen / vnd gegen das forderst glied der Doppelsoldner / vnd an stadt derer so geschossen haben / anschlagen / vnd Schiessen / vnd wenden sichs auffm Fuß vmb die rechte handt vmb / vnd folget ein jeder seinem mann / welcher für ihm gehet folgen / auch gleichfalls ihr glied halten / daß also die fördersten auff der hindersten / vnd der hindersten auff der fördersten platz kommen / vnd ein jedes glied vorn gegen den Doppelsoldnern auff bestimpten platz Schiessen / nach daß müssen sie alle thun / vnd ein jeder insonderheit seinem mann. Wann sie dann so:liches alle vnd ein jedes glied insonderheit verricht haben / sie ihr angesicht vom Feindt gegen Litera A. gewent / muß der Capitein oder Befelchsmann alsdann ruffen oder sagen / Rechts vmb kehrt euch / das sie ihr angesicht wider hinauffwarts zum Feindt / vnd gegen Litera B. heben / vnd also mit dem Fliegel wider fort ziehen / bis das förderst glied Schützen / Gegen daß förderst glied Doppelsoldner kommen / alsdann muß widerumb daß forderste glied Schützen anschlagen / vnd Schiessen /